

**ZAPISNIK SA
22. RADNE SJEDNICE SKUPŠTINE KANTONA SARAJEVO
ODRŽANE 27.12.2012.GODINE SA POČETKOM U 10,00 SATI**

Sjedinići prisustvuju poslanici/zastupnici:

SOCIJALDEMOKRATSKA PARTIJA BIH

1. Brigić Ivan
2. Crnogorac Branislav
3. Efendić Faruk
4. Fazlija Nedžad
5. Hajdarević Hadžem
6. Malić Mirjana
7. Papo Edina
8. Srna-Bajramović Segmedina

STRANKA DEMOKRATSKE AKCIJE BIH

1. Ademović Kemal
2. Alić Haris
3. Čomor Eldar
4. Konaković Elmedin
5. Zukić Amir
6. Amor Mašević
7. Dževad Hodžić

SAVEZ ZA BOLJU BUDUĆNOST

1. Rađo Dževad
2. Naser Nabil
3. Filipović Selma
4. Talović Munir
5. Solaković Adnan
6. Ademović Kenan
7. Izudin Bajrović

BOSANSKOHERCEGOVAČKA PATRIOTSKA STRANKA - Sefer Halilović

1.Backović Zaim

NAŠA STRANKA- NOVA SOCIJALISTIČKA PARTIJA- Zdravko Krsmanović

1.Kojović Predrag

NARODNA STRANKA RADOM ZA BOLJITAK

1.Čardžić Damir

BOSS- Mirnes Ajanović

1. Radeljaš Esed

SOCIJALDEMOKRATSKA UNIJA

1.Mujo Hošić

SAMOSTALNI POSLANICI/CE

1.Zeković Enes

2.Jurić Mira

3.Vajzović Hanka

4.Mehmedić Besim

5.Mulaosmanović Fikreta

6.Pindžo Mirsad

7.Sabahudin Hodžić

Predsjedavajuća Skupštine Mirjana Malić je pozdravila sve prisutne, uputila čestitke povodom nastupajućih praznika i otvorila 22. Radnu sjednicu Skupštine Kantona Sarajevo.

Predsjedavajuća je konstatovala da prema evidenciji Službe, sjednici prisustvuju 33 poslanika, što je dovoljan broj za punovažan rad i odlučivanje.

Prije prelaska na utvrđivanje Dnevnog reda, predsjedavajuća Malić je upoznala poslanike da je na osnovu Odluke Centralne izborne komisije BiH, broj: 06-1-07-1-1514/12 od 12.12.2012.godine Hošić Muji, sljedećem kvalificiranom kandidatu sa liste političkog subjekta Socijal demokratske unije Bosne i Hercegovine za Skupštinu Kantona Sarajevo, dodijeljen mandat poslanika u Skupštini Kantona Sarajevo.

Predsjedavajuća Skupštine je pozvala uvaženog gospodina Muju Hošića da položi Svečanu izjavu.

SVEČANA IZJAVA

„SVEČANO IZJAVLJUJEM DA ĆU POVJERENU DUŽNOST OBAVLJATI SAVJESNO , PRIDRŽAVATI SE USTAVA I ZAKONA BOSNE I HERCEGOVINE, FEDERACIJE BOSNE I HERCEGOVINE I KANTONA SARAJEVO, ZALAGATI SE ZA LJUDSKA PRAVA I SLOBODE I DA ĆU U SVIM PRILIKAMA ŠTITITI INTERESE BOSNE I HERCEGOVINE, FEDERACIJE BOSNE I HERCEGOVINE I KANTONA SARAJEVO I RAVNOPRAVNOST NARODA I GRAĐANA KOJI U NJIMA ŽIVE“.

Predsjednik Kluba poslanika SDP Fazlija Nedžad je nakon čestitanja novom zastupniku u Skupštini imao poslovničku intervenciju u kojoj je napomenuo na zahtjev Kluba poslanika SDP da se u skladu sa novom parlamentarnom većinom napravi novi raspored u skupštinskim klupama, te da bi poslanik Damir Čardžić trebao da sjedi gdje i ostali poslanici. Nakon intervencije poslanika Nedžada Fazlije uslijedila je kraća diskusija između poslanika Damira Čardžića i predsjedavajuće Mirjane Malić.

Prijedlog dnevnog reda 22. Radne sjednice Skupštine Kantona Sarajevo utvrdio je Kolegij Skupštine na sjednici održanoj dana 14.12.2012 .godine.

Na osnovu člana 73. Poslovnika Skupštine Kantona Sarajevo („Službene novine Kantona Sarajevo“ – Drugi novi prečišćeni tekst, br.41/12), Kolegij Skupštine Kantona Sarajevo, dana 21.12.2012.godine, prihvatio je zahtjev Vlade Kantona Sarajevo, da se Prijedlog dnevnog reda 22. Radne sjednice, dopuni sa sljedećim tačkama:

- 1. Prijedlog odluke o davanju saglasnosti na Odluku o privremenom finansiranju Zavoda zdravstvenog osiguranja Kantona Sarajevo za period od 01.01. do 31.03.2013. godine; (razmatraće se kao 7. tačka)**
- 2. Prijedlog odluke o davanju saglasnosti na Izmjene i dopune Finansijskog plana Zavoda zdravstvenog osiguranja Kantona Sarajevo za 2012. godinu; (razmatraće se kao 8. tačka)**
- 3. Prijedlog odluke o davanju saglasnosti na Odluku o privremenom finansiranju potreba JU „Služba za zapošljavanje Kantona Sarajevo” Sarajevo za period od 01.01. do 31.03.2013. godine, broj: 05/1-1925/12 od 13.12.2012. godine; (razmatraće se kao 13. tačka)**

Na osnovu naprijed navedenog, Skupština je, većinom glasova (32 za i 1 protiv), usvojila dopunjeni Dnevni red 22. Radne sjednice:

1. Poslanička pitanja, inicijative i odgovori;
2. Prijedlog Zakona o javnim skijalištima;
3. Nacrt zakona o izmjenama Zakona o koncesijama;
4. Prijedlog odluke o privremenom finansiranju potreba Kantona Sarajevo za period 01.01. do 31.03.2013. godine;

5. Prijedlog odluke o davanju garancije u ime KJKP "Sarajevogas" d.o.o. Sarajevo u visini razlike fakturisanog i plaćenog iznosa mjesečne potrošnje prema BH Gasu d.o.o. Sarajevo;
6. Prijedlog odluke o zaštiti i poboljšanju kvaliteta zraka u Kantonu Sarajevo;
7. Prijedlog odluke o davanju saglasnosti na Odluku o privremenom finansiranju Zavoda zdravstvenog osiguranja Kantona Sarajevo za period od 01.01. do 31.03.2013. godine;
8. Prijedlog odluke o davanju saglasnosti na Izmjene i dopune Finansijskog plana Zavoda zdravstvenog osiguranja Kantona Sarajevo za 2012. godinu;
9. Prijedlog Odluke o davanju saglasnosti na Izmjene i dopune Plana kapitalnih ulaganja Zavoda zdravstvenog osiguranja Kantona Sarajevo u javnim zdravstvenim ustanovama za period 2011-2013 godina;
10. Prijedlozi odluka o izmjenama Odluke o preuzimanju prava osnivača:
 - a) Javne ustanove „Narodno pozorište Sarajevo“
 - b) Javne ustanove „Sarajevska filharmonija“.
 - c) Javne ustanove „Pozorište mladih“ Sarajevo;
 - d) Javne ustanove „Kamerni teatar 55“ Sarajevo;
 - e) Javne ustanove „Sarajevski ratni teatar – SARTR“.
 - f) Javne ustanove „MESS -Međunarodni teatarski i filmski festival Sarajevo“;
 - g) Javne ustanove „Muzej Sarajeva“;
 - h) Javne ustanove „Kantonalni zavod za zaštitu kulturno-historijskog i prirodnog naslijeđa Sarajevo“;
 - i) Javne ustanove „Historijski arhiv Sarajevo“;
 - j) Javne ustanove „Collegium artisticum“ Sarajevo;
 - k) Javne ustanove „Biblioteka Sarajeva“;
 - l) Javne ustanove „Bosanski kulturni centar“ Sarajevo;
 - m) Javne ustanove za organizovanje kulturnih programa i međunarodnu saradnju u kulturi „Sarajevo art“;
 - m) Javne ustanove Muzej „Alija Izetbegović“;
11. Prijedlog odluke o izmjeni Odluke o osnivanju Skupština javnih preduzeća čiji je osnivač Kanton Sarajevo i prijedloge odluka o izmjenama Odluka o usklađivanju statusa Kantonalnih javnih komunalnih preduzeća sa Zakonom o javnim preduzećima u Federaciji Bosne i Hercegovine i to:
 - a) "Vodovod i kanalizacija",
 - b) „Rad“,
 - c) „Park“,
 - d) „Pokop“,
 - e) „Sarajevogas“,
 - f) „Toplane“,
 - g) „Tržnice-pijace“,
 - h) "Kantonalna veterinarska stanica",
 - i) "ZOI84",
 - j) „PD Butmir“,
 - k) Centar "Skenderija",
 - l) „Sarajevo-šume“
 - m) "Gradski saobraćaj "
 - n) "Televizija Kantona Sarajevo"

12. Prijedlog odluke o davanju saglasnosti na Poslovnik o radu Vijeća nacionalnih manjina Kantona Sarajevo;
13. Prijedlog odluke o davanju saglasnosti na Odluku o privremenom finansiranju potreba JU „Služba za zapošljavanje Kantona Sarajevo” Sarajevo za period od 01.01. do 31.03.2013. godine, broj: 05/1-1925/12 od 13.12.2012. godine;
14. Prijedlog odluke o davanju saglasnosti na Izmjene i dopune Finansijskog plana prihoda i izdataka Javne ustanove “Služba za zapošljavanje Kantona Sarajevo” Sarajevo za 2012. godinu;
15. Prijedlog Odluke o davanju saglasnosti na Program rada Kantonalnog stambenog fonda Sarajevo za 2013. godinu;
16. Prijedlog Odluke o davanju saglasnosti na Plan rada sa finansijskim planom prihoda i rashoda za 2013. godinu Kantonalnog stambenog fonda Sarajevo;
17. Prijedlog Odluke o davanju saglasnosti na Finansijski plan Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe za 2013.godinu, sa Planom razvojnih programa – Investicionim planom;
18. Prijedlog Odluke o davanju saglasnosti na Programa rada Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe za 2013.godinu
19. Izvještaj o realizaciji Plana povratka u i iz Kantona Sarajevo za period 01.01.-30.06.2012. godine sa osvrtom na problematiku obezbjeđenja alternativnog – nužnog smještaja;

Uz poziv za sjednicu i u dopunskom materijalu, kao informativni materijal poslanicima je dostavljeno:

- Prijedlog odluke o privremenom obustavljanju izvršavanja pojedinih rashoda i izdataka u Budžetu Kantona Sarajevo za 2012. godinu;
- Informacija o monitoringu i evaluaciji Programa sufinansiranja zapošljavanja pripravnika VSS, VŠS, SSS i KV stručne spreme – 2011;
- Akcioni plan za implementaciju strategije protiv maloljetničkog prijestupništva za BiH u Kantonu Sarajevo;

Prije prelaska na prvu tačku Dnevnog reda, predsjedavajuća je pozvala poslanike da se izjasne o zapisnicima koji su preostali sa prethodnih sjednica, zapisnici sa 19, 20 i 21. Radne sjednice Skupštine Kantona Sarajevo.

Zapisnik sa 19. Radne sjednice dostavljen je poslanicima uz poziv za sjednicu, zajedno sa stenogramom iste sjednice.

Skupština je, jednoglasno (31 za) potvrdila Zapisnik sa 19. Radne sjednice Skupštine Kantona Sarajevo, održane dana 19.09.2012 . godine, bez primjedbi.

Zapisnik sa 20. Radne sjednice dostavljen je poslanicima uz poziv za sjednicu, zajedno sa stenogramom iste sjednice.

Bez primjedbi, Skupština je jednoglasno potvrdila Zapisnik sa 20. Radne sjednice Skupštine Kantona Sarajevo, održane dana 21.09.2012. godine.

Zapisnik sa 21. Radne sjednice dostavljen je poslanicima uz poziv za sjednicu, zajedno sa stenogramom iste sjednice.

Bez primjedbi, Skupština je jednoglasno potvrdila Zapisnik sa 21. Radne sjednice Skupštine Kantona Sarajevo, održane dana 21.11.2012. godine.

Nakon izjašnjavanja o zapisnicima, uslijedila je realizacija prve tačke dnevnog reda.

AD - 1.

POSLANIČKA PITANJA, INICIJATIVE I ODGOVORI

Dio odgovora na poslanička pitanja poslanici su dobili uz poziv za sjednicu, dio u dopunskom materijalu, a dio odgovora uručen im je pred početak sjednice.

Predsjedavajuća Malić je pozvala poslanike da ukoliko to žele, daju komentare na dostavljene odgovore na poslanička pitanja. Komentare na dostavljene odgovore imali su sljedeći poslanici: **Segmedina Srna, Nedžad Fazlija, Dževad Rađo, Naser Nabil i Sabahudin Hodžić.**

Nakon kratkih komentara na dostavljene/nedostavljene odgovore na poslanička pitanja, uslijedilo je pokretanje novih inicijativa i postavljanje novih poslaničkih pitanja.

Poslanik Besim Mehmedić je postavio sljedeće poslaničko pitanje:

“S obzirom da sam na 17. radnoj sjednici a to je 27.juna postavio pitanje Ministarstvu saobraćaja, nisam dobio odgovor ali je vezano za rekonstrukciju pruga, pa ću onda iskoristiti svoje pravo da ponovno postavim pitanje i nadam se da novi ministar neće tako žurno odgovoriti kao prošli. Da će bar za godinu dana naći priliku da mi odgovori.

Postavljam pitanje. Ja sam samo iskoristio priliku kao i drugi zastupnici, komentarisali su i ja isto to radim. Dobro.

Ovako, zašto izvedbena projektna dokumentacija nije odabrana na osnovu javnog poziva? Zašto je ovaj projekat realizovan ugovorom po principu ključ u ruke? Koliko je ponuđača dostavilo ponude na tender za izvođenje radova? I koje su cijene ponude? Da li je naknadnom odlukom ministarstva odobreno svim firmama koje su dostavile ponude na tender učestvovanje u rekonstrukciji pruge, kako se ne bi žalile na proceduru odabira izabranog ponuđača na tenderu? Da li je u toku procedure odabira naknadno izmijenjen uslov iz tendera kako izabrani izvođač ne bi bio eliminiran? Da li je izabrani ponuđač vršio rekonstrukciju pruge još negdje prije nego što je dobio rekonstrukciju u Sarajevu? Koliko stalno ima zaposlenih firma koja je dobila posao? Da li su šine koje su nabavljene u Austriji mogle se nabaviti u Željezari Zenica? Kolika je vrijednost radova projektovanja i nadzora a kolika vrijednost nabavke i ugradnje novih šina? Kolika je ukupna vrijednost radova i sa kojih pozicija u Budžetu za 2012 godinu su se finansirali radovi projektovanja, nadzora i izvođenja radova, i koliko je novca izdvojeno iz budžeta za 2012 godinu kao i sve preraspodjele unutar

ministarstva kojima se finansirao ovaj projekat. Da li je novac sa namjenske pozicije budžeta otvaranje novih parkirališta utrošen za realizaciju ovog projekta. I na kraju pošto je ovaj projekat realizovan ugovorom po principu ključ u ruke, koji ne daje ama baš nikakvu zakonsku mogućnost plaćanja ne predviđenih radova, zašto su odobravane građevinske situacije za nepredviđene radove, koje su za krajnju konsekvencu imale da je ovaj projekat plaćen više od 1 milion KM nego što je osnovni ugovor koji je to predviđao. Sada sam ovo iskoristio imat ću kasnije još jedno pitanje. Ako mogu, a vezano je za zaključak koji smo mi kao Skupština obavezali Vladu da za narednu sjednicu tj. Ovu pripremi informaciju o modalitetima o modalitetima implementacije odluke o prihvatanju zaduženja po ugovoru zajma. Pa sada, s obzirom da razumijem da je bio kratak rok da se ova informacija pripremi, sugeriram Vladi i premijeru, da ako je moguće, i resornom ministru, za narednu sjednicu dobijemo ovu informaciju. Pošto sam ja bio inicijator ovog zaključka a svi smo ga usvojili, razumijem da nije se možda moglo pripremiti, ali bi dobro bilo da nam odgovore može li to za narednu sjednicu.”

Poslanik Predrag Kojović postavio je poslaničko pitanje:

“Zahvaljujem predsjedavajuća. Pozdravljam sve prisutne, ja nisam sada shvatio da je zamjerka na odgovor kratica za postavljanje pitanja, pa sam sačekao da dođem na red. Prije tačno dvije godine, samo dopustite da ovo kažem, stvarno smatram vrlo neodgovornim i indikativnim, da novi premijer Kanton Sarajevo ne smatra da je prvi sat vladin koji je ovdje održava na prvoj radnoj sjednici od kako je izabran na tu funkciju, dovoljno važan da bi nas on počastvovao svojim prisustvom ovdje. Znači, prije dvije godine smo pokrenuli inicijativu za ukidanje diskriminacije prema ostalima, na koji su stavljene sve moguće prepreke koje su mogle biti stavljene i ta inicijativa je zahvaljujući mnogim ovdje u ovoj Sali, kolegici Srni, kolegi Brigiću i pogotovo bivšem premijeru Musiću, prošla sve te prepreke, sve komisije, prošla javnu raspravu i trebala je biti na dnevnom redu u ovoj Skupštini negdje u septembru mjesecu. Sada smo znači već na kraju ove godine, ta inicijativa se još uvijek nije našla na dnevnom redu. Nepriročno je bilo da ja ovdje sada iznesem neformalni odgovor koji mi je premijer Zeljković dao prije početka sjednice, ali dopustite da kažem ovo, držati diskriminaciju protiv ostalih, ili Inicijativu za rješavanje te diskriminacije taocem dnevno političkih, usko stranačkih interesa, je ono što onemogućava našu zemlju i ovaj Kanton da napravimo bilo kakav iskorak iz sadašnje situacije. Ljudi moraju početi da razmišljaju da se nekada pravilni zakoni moraju početi primjenjivati i onda kada je to u korist sopstvene štete. Uglavnom moje pitanje je bilo sljedeće, ja sam htio direktno da pitam premijera Zeljkovića da li će ovu inicijativu, znači amandmane koji su potpuno spremni i iz razgovora sa kolegom Brigićem znam da u ovoj Skupštini postoji neophodna dvotrećinska većina da se oni izglasaju da ih stavi kao prvu tačku dnevnog reda na sljedećoj sjednici Skupština Kantona Sarajevo.”

Poslanik Elmedin Konaković je pokrenuo inicijative:

“Inicijativa broj 1, da se u što skorijem roku organizuje sastanak predstavnika Ministarstva saobraćaja, Ministarstva unutrašnjih poslova, Kantonalne inspekcije, zastupnika u SKS, taksi udruženja po pitanju rješavanja problema nelegalnih taksista u Kantonu Sarajevo. Sedmi put čitam istu inicijativu.

Inicijativa broj 2. pokrećem inicijativu za uvođenje trećeg časa tjelesnog odgoja ili fizičkog vaspitanja u osnovnim školama. Molim ministra Marjanovića da u skladu sa Prosvjetno

pedagoškim zavodom i svojim saradnicima pokrene potrebne procedure te o tome izvijesti Skupštinu Kantona Sarajevo. Drugi put čitam istu inicijativu.

I treća inicijativa, pridružujem se inicijativama kolegice Srne, Fazlije, Kojovića, Nabila, da se amandmani na Ustav Kantona Sarajevo nađu kao tačka dnevnog reda na narednoj sjednici Skupštini Kantona Sarajevo, te ne dozvoljavam da bilo ko manipuliše ili govori o tome kako zna da postoji dvotrećinska većina a ne postoji politička volja. Ne želim da amnestiram ili odgovaram u ime Vlade ili resornih ministara, ali želim da preuzmemo svi zajedno dio odgovornosti u dijelu političkog haosa koji kreiramo te nemogućnosti da Vlada, vjerovatno bi to i bivša Vlada uradila, zbog smjena, promjena, imenovanja, to nije bila tačka dnevnog reda, koja je trebala biti u septembru, ali ne postoji ni prostor za manipulacije političke prirode da bilo ko koga ovdje optužuje, a posebno ne postoji da se smatra više zaslužnim zato što će tačka dnevnog reda biti na narednoj Skupštini Kantona Sarajevo, ja se barem nadam.”

Poslanik Zaim Backović je postavio sljedeća poslanička pitanja i pokrenuo inicijative:

“Ministarstvo pravde. Pokrećem inicijativu za izmjenu odluke o taksama pri sudskim sporovima koji se vode na općinskom i Kantonalnom sudu u Sarajevu. Obrazloženje, građani Sarajeva su diskriminirani u odnosu na ostale građane BiH tim što u sudskim sporovima materijalne prirode oni koji su u pravu i tuže moraju da plate da bi mogli da vode spor. Primjer. Nedavno je donesena presuda koja je vrlo čudna, naravno ona ide sada i na druge instance i na VTV pa na dalje u kojem se u preambuli kaže, dostavlja se oštećenim, nabrajaju se imena oštećenih, i obavještavaju se da se obustavlja postupak protiv okrivljenih, kojih je osam. Tih osam je izvršilo otuđenje milion i šesto hiljada KM, i u konačnosti u obrazloženju se kaže da ukoliko ovi ne pokrenu građansku parnicu oštećeni to što su ti lopovi otuđili bit će vraćeno lopovima. Neprimjerena presuda. E sada ti oštećeni građani moraju da plate taksu a znam o kome se radi, oni to nemaju odakle platiti i sada će lopovima biti vraćeno milion i šesto hiljada maraka. Za takvo otuđenje predviđene su zakonske kazne od pet pa na gore godina, a neko je to držao deset godina u ladici i nije riješio spor. Ali nije ni to, nego kada građanin povede običnu parnicu, parnicu u kojoj je recimo za klevetu, mora da plati on a ne onaj koji je oklevetao. I tako redom. Ovo je jedini Kanton koji ima takvu odluku, jedini prostor jer nema ni RS. Samo ovaj prostor to ima. Neki građani će pokrenuti parnicu pred vrhovnim sudom i pokušat će da dođu do nas poslanika da traže da se ide i ocjena ustavnosti takve odluke.

Pitanje, također postavljam pitanje čitavoj Vladi. Obzirom da nesporno, u ovom gradu se sa našom omladinom dešava što šta što nije u redu, prije svega sa aspekta korištenja i konzumiranja opojnih droga, zašto, zbog čega, kako, i koji su to razlozi da se nije pristupilo realizaciji terapijske zajednice za žene? Ovaj Kanton nema terapijske zajednice da spasimo tu omladinu, za žensku populaciju, te iniciram da se o ovome dobro razmisli, i nađu modusi da se krene u realizaciju terapijske zajednice za žensku populaciju u ovom Kantonu.

Sljedeće pitanje, obzirom na to da sam davno dobio odgovor na pitanje o broju vozila u ovom gradu, u ovom Kantonu, bilo ih je tada 136.000, od tada do danas to su skoro dvije godine, vjerovatno je još jedno 10.000 znači preko, 150.000 vozila, da je parking mjesta, odnosno saobraćaj u mirovanju samo oko 40.000 šta ćemo sa onih 100.000 vozila koji nemaju i zašto se ne pristupa realizaciji, napokon više realizaciji izgradnje podzemnih, nadzemnih, više ne znam kakvih javnih parking mjesta, kako bi smo ovaj grad oslobodili od uzurpacije. Postoje naselja kroz koja je više nemoguće proći. Molim ministre da kolektivno sjednu u vozila i provozaju se Koševskim brdom. Da se samo provozaju. I molim ministre da se provozaju

Brekom. Molim ministre da se provozaju Ciglanama. Ali ono što je napravljeno u kružnom toku, jer se Ciglanama može prići samo na jednom mjestu a to je na semaforu kod pijace i nikako drugačije. Zahvaljujem se gospodine Ademoviću, to su dva pitanja i jedna inicijativa.”

Poslanik Solaković Adnan je postavio sljedeća poslanička pitanja:

“Molim vas, jedno se pitanje odnosi na ministra privrede, gđina Hrenovice. A odnosi se na upravo JP Skenderija, gdje od prošle godine Skenderija trpi milion i pol gubitaka zbog elementarne nepogode gubi milion i pol je do sada izgubila KM. Što se tiče ove ledene dvorane. Nisam u situaciji, ustvari jesam u situaciji,ustvari i ne želim da nekoga ja ružim ovdje, samo skrećem pažnju da gospodin ministar malo obilazi objekte koji su od jako većeg značaja, ali ja ipak mislim da je veći značaj Skenderija koja je u jako teškoj situaciji. A sada dolazimo do situacije da je bezbjedonosna situacija za ljude koji rade unutra upitna. Prema tome treba malo alarmantno da se gleda na tu situaciju. A to mu je veoma blizu, mogu ga ja odvesti za ruku ako hoće. Postavljam pitanje direktno ministru Hrenovici kada će doći u posjetu jel su ga nekoliko puta i zvali, nije se odazvao na to. Čak šta više preko medija. Šta konkretno planira uraditi na rješavanju nagomilanih problema za JP Skenderiju i kada će biti isplata uposlenima koji već tri mjeseca nisu dobili naknadu za rad? Ja se zahvaljujem na ovom prvom pitanju, nadam se da ministar neće šta zahaturit.

Drugo moje pitanje se odnosi na obilježavanje Dana državnosti BiH, 25. novembar. Fond memorijala Kantona Sarajevo organizovao je 26. novembra u Narodnom pozorištu u Sarajevu akademiju povodom 25. novembra Dana državnosti BIH i manifestacije Odbrane BIH Igman 2012, koja je zvanično počela 01. marta 2012 a završila se 26. pa dobro ljudi, jel ja ovdje moram stvarno biti poslanik da bih ja morao dobiti poziv za to? Ja pred ovom binom, a mnogi se busaju iz ove stranke, kako su heroji, a još im se puše tene kako su bježali preko piste, a ja dalje moram ovdje kao poslanik moliti da se pošalje poziv onim ljudima koji su argumentovano odbranili Igman, plato 93 godine. Hoćete li imena da vam dam kao prošle godine. To je ružno. Prema tome to znači neko je uzeo ekskluzivno pravo ja mislim da su ovi ispred mene što su tu, uzeli ekskluzivno pravo da može određivati ko će biti, ko neće biti prisutan. Gospodo draga meni je Lazar poginuo na Igmanu, on nije bio član SDA, braneći Igman. Pazite. A mnogi su bili dole u podrumu. Da se vratim, isto na Dan državnosti delegacija Kantona je polagala i cvijeće ispred Vječne vatre, na Kovačima, ispred spomenika ubijenoj djeci Sarajeva, na Vracama i ispred biste Maršala Tita. Opet, znači šehide su uzele neke stranke, to su Kovači, a nekima su dati Vraca, Maršal Tito, to znači to je totalno klasiranje nekoga po strankama. Ja mislim da ovo nema smisla i samo hoću da postavim pitanje ko je slao pozive za organizirane prijeme. Kome su ti pozivi bili dostavljeni? Da li svim poslanicima ili samo određenim? Da li je to po nekim mjerilima stranke SDA? Jer ni svi borci koji su učestvovali u borbama i odbrani Igmana nisu izgleda bili isti? Pitam Vladu Kantona Sarajevo ko je određivao delegaciju za polaganje cvijeća i ko je određivao gdje će ko i na kojem mjestu biti u delegaciji, po kojem kriteriju? Ja sam maloprije naveo. Hvala lijepo. Ja sam bio kratak.”

Predsjedavajuća Mirjana Malić dala je dio odgovora na pitanje poslanika Adnana Solakovića.

Poslanik Selma Filipović je pokrenula inicijativu i postavila poslaničko pitanje kako slijedi:

“Po drugi put tražim od Vlade i resornog ministarstva da u što skorijem roku realizira svoje obaveze i zakone o visokom obrazovanju Kantona Sarajevo i usvoji akt kojim se preciznije uređuju pitanja imenovanja članova visoko školske ustanove kao javne ustanove, što je preduslov za formiranje UO UNSA po Zakonu o visokom obrazovanju, a ne po uredbi sa zakonskom snagom o ustanovama i time otvore put za velike budžetske uštede koje bi se ostvarile prestankom rada UO i NO po fakultetima i akademijama koje godišnje budžet opterećuju za preko 570.000 KM. To bi bila inicijativa.

A pitanje, obraćam se resornom ministru za obrazovanje, nauku i mlade, prof. dr. Damiru Marjanoviću sa upitom da mi se da precizna informacija u kojoj je fazi prelazak fakulteta, odnosno akademija članica UNSA na trezorsko poslovanje, kao i dokle se došlo u realizaciji izrade kolektivnog ugovora za oblast visokog obrazovanja u Kantona Sarajevo, kao jednog od temeljnih dokumenata strategije razvoja visokog obrazovanja i elaborata o integraciji UNSA koji su usvojeni na ovoj Skupštini. Na kraju molim premijera Vlade Kantona Sarajevo, gđina Suada Zeljkovića i resornog ministra, prof. dr. Damira Marjanovića da mi daju odgovore za koliko je akademskih novaka, odnosno, asistenata odobreno budžetskih sredstava da bi se dobili poslovi na fakultetima, odnosno akademijama, članicama UNSA, od kada se promoviraju zlatni studenti. Zlatna značka UNSA. A za građane Kantona Sarajevo informacija da se svečana promocija diplomanata i magistranata UNSA održava od 2004 godine i do danas je promovirano preko 200 zlatnih studenata, najboljih u svojoj generaciji? Molim odgovore na ova pitanja.”

Poslanik Kenan Ademović je postavio poslanička pitanja i pokrenuo inicijativu:

“Molim nadležno Ministarstvo da mi odgovori da li je tačno da stanovnici MZ Dobroševići, ulica koja vodi ka MZ Dobroševići pješake 3 km do kontejnera kako bi bacili smeće. Ja znam da je tako, jer sam bio na licu mjesta. Da li je ovo sramota? Da li će nadležno Ministarstvo postaviti uz ulicu na svaki 50 do 100 metara par kontejnera ili ćete dozvoliti da ovi ljudi u 21 vijeku žive u nehumanim uslovima. Ja ću vas podsjetiti da ova MZ nema ni kanalizaciju, ovi ljudi plaćaju odvoz smeća. Molim da mi se odgovori da li smatrate da to treba da rade s obzirom na situaciju gore opisanu?

Prva inicijativa. Pokrećem inicijativu prema nadležnom Ministarstvu s ciljem donošenja odluke o obustavljanju svih izbora nastavnika i saradnika na UNSA i u drugim univerzitetima u onim slučajevima u kojima postoji sumnja na koruptivne radnje prilikom izbora. U tom smislu Ministarstvo nauke, obrazovanja i mladih Kantona Sarajevo treba biti zaduženo da identificira te slučajeve i postupi u skladu sa odlukom ove Skupštine. Da poništi konkurs i obustavi izbor dok se ne utvrdi pravo stanje i otkloni sumnja u korupciju. Molim Ministarstvo da odmah formira kompetentnu komisiju koja će se na meritoran način baviti ovim problemom i poduzeti aktivnosti koje ova Skupština mu naloži.

I moja druga i zadnja inicijativa, je upućena prema premijeru gđinu Zeljkoviću, prema Ministarstvu pravde i prema Tužilaštvu Kantona Sarajevo. Evidentno je da su građani Kantona Sarajevo pokradeni, da je Kantona Sarajevo pokraden, da je Budžet Kantona Sarajevo pokraden, da su javna preduzeća pokradena, da su javne ustanove pokradene, da je sport uništen, KK Bosna pokradena. Da je pokradeno više od milijardu KM za ovih skoro 20 godina i evidentno je da niko nikada nije odgovorio za ovo. Građani Kantona Sarajevo moraju znati ko ih je pokrao. Građani Kantona Sarajevo moraju znati zašto je Gras u minusu 120 miliona KM, ko je kriv za to? Građani moraju znati ko je uništio Skenderiju? Građani moraju znati ko je uništio sport u Kantona Sarajevo? Ko je uništio KK Bosnu na sramotu našeg glavnog grada? Građani Kantona Sarajevo moraju znati zašto da se zaposlite u domu

zdravlja, bolnici, VIK-u, Toplanama, Parku itd morate nekome dati 5, 10 ili 15.000 KM. Građani moraju znati zašto se ne plaća koncesija na iskorištavanje naših prirodnih bogatstava. Mogao bih još nabrajati ali smatram da je i ovo dovoljno. Sve ovo gore se zove korupcija i mito. Za ovih skoro 20 godina, Vlade ovog Kantona nisu uradile ništa da ovo spriječe, zato u ime građana Kantona Sarajevo tražim od premijera i nadležnih ministarstava i Tužilaštva Kantona Sarajevo da pokrenu istragu protiv sljedećih osoba:

- protiv svih premijera od poslije prvih poslije ratnih izbora do danas,
- protiv svih ministara koji su bili na čelu javnih preduzeća, javnih ustanova od prvih poslije ratnih izbora do danas,
- protiv svih direktora tj ovlaštenih lica koji su bili na čelu javnih preduzeća, javnih ustanova,
- protiv svih članova NO i UO te Skupština na čele gore spomenutih preduzeća,
- protiv svih ministara MUP-a do danas jer nisu uradili ništa po ovom pitanju a javna je tajna ko je šta uradio

Što se mene lično tiče, svi ovi gore pomenuti, pod navodnicima su pokrali ovaj Kanton jer svaki koji je došao na mjesto prethodnika, da li to bio premijer ili ministar ili ostali znali su šta su zatekli kada su preuzimali dužnosti i nisu uradili ništa. Ja ću svaka dva mjeseca obavještavati građane Kantona Sarajevo o rezultatima koje ste ostvarili po mojoj inicijativi.”

Poslanik Haris Alić je pokrenuo sljedeću inicijativu:

“Prije nego što saopštim svoju inicijativu hoću da istaknem apsolutnu podršku inicijativi kolege Konakovića a tiče se uvođenja trećeg časa tjelesnog odgoja u škole jer mnogobrojna istraživanja na FASTO i u cijeloj regiji ukazuju na tu potrebu.

Moja je inicijativa usmjerena prema Ministarstvu za obrazovanje nauku i mlade, a tiče se zapravo školskih odbora za koje je konkurs već odavno završen i ta mogu slobodno reći agonija traje već nekoliko mjeseci. Dakle ja iniciram intenzivnije i ažurnije aktivnosti resornog ministarstva u imenovanju novih školskih odbora u OŠ Kantona Sarajevo, jer problemi u tim školama već se nagomilavaju, i javlja se potreba da se to što prije završi.”

Poslanik Enes Zeković postavio je poslaničko pitanje i pokrenuo inicijativu kako slijedi:

“Zastupničko pitanje prema ministru za urbanizam gđinu Petroviću, da li je tačno da su započeti radovi na lokalitetu Zlatišta na izgradnji spomen obilježja, ne znam već čega tj onoga krsta? Ako je tačno trebalo bi da smo informisani, čak postoji neka priča da je to prostor Kanton Sarajevo. Ako je tačno, ovaj dom, ova Skupština bi trebala da zauzme stav po tom pitanju.

Što se tiče zastupničke inicijative pokrećem prema Ministarstvu za obrazovanje, da se u narednom Budžetu planiraju sredstva za obnovu vrtića na prostoru Pionirske doline s razlogom, zato što imamo objekat koji je u ovih predhodnih 20 godina služi za konzumiranje opojnih droga, s jedne strane, s druge strane imamo zahtjev nekoliko hiljada građana sa tog prostora za otvaranje tj vraćanje u prvobitnu namjenu tog vrtića za djecu. Manipuliše se na ovakve i onakve načine i mislim da bi trebalo podhitno poduzeti sve moguće radnje da 2013 ako Bog da vratimo namjeni taj objekat gdje je bio planiran.”

Poslanik Eldar Čomor je pokrenuo sljedeću inicijativu:

“Ja imam jednu inicijativu koju upućujem Ministarstvu saobraćaja i Kantonalnom preduzeću Gras Sarajevo da se izvrše sve neophodne pripreme za poboljšanje usluga prevoza učenika u

narednom periodu odnosno u drugom polugodištu. Obrazloženje: svjedoci smo u posljednje vrijeme da se često dešava ispuštanja linija, pogotovo u vremenu kada učenici odlaze ili se vraćaju sa nastave. Ispuštanjem linija uzrokuje kašnjenje i u velikom broju nedolazak ili izostanak učenika sa nastave. Kraj je prvog polugodišta, slijedi zimski raspust, pauza te ova inicijativa će dati dovoljno vremena i Ministarstvu i Gradu da se ovakve stvari više ne dešavaju u drugom polugodištu. Znači mogu se izvršiti pripreme kako bi se ove stvari u drugom polugodištu izbjegle.”

Poslanik Nedžad Fazlija je postavio poslaničko pitanje:

“Također se pridružujem podrškama ovoj inicijativi kojom sam ono što se kaže svjedočio i potpisao a vezano za amandmane i otklanjanje diskriminacije ostalih i ubijeđen sam da je bi ova inicijativa ugledala svjetlo dana da se nismo mi malo igrali pa izglasavali nepovjerenje Vladi i birali drugu Vladu, ali šta je tu je. I nadam se da u ovoj skupštinskoj Sali neće biti niko ili ne postoji niko ko će biti protiv te inicijative kada ona dođe i nadam se da će doći vrlo brzo i u to uopšte ne sumnjam da će doći na dnevni red. Klub SDP također nije dobio poziv, to je predsjedavajuća, nije svečana sjednica koja je bila povodom 25. u petak nego svečana sjednica 26 koju je organizovao Fond memorijala, tako da za tu akademiju nismo, a vezano je za odbranu Igmana 93. ja imam više pitanja, pročitat ću samo tri a ostalo ću da mi se odgovori pismeno. Pa mogu dostaviti pismeno ne moram pročitati. Ja ću pročitati onoliko koliko mi je dozvoljeno a ostalo ću dostaviti. Znam, to. Ja ću biti vrlo kratak.

Ovo je pitanje već postavio moj kolega Faruk Efendić evo ponovo postavljamo. Tražim da nam se dostavi pregled naknada po osnovu komisijskog rada i prekovremenog rada, sa preciznim iznosima za 2010, 2011 i 2012 godinu i također tražim da nam se dostavi prijedlog dobijenih nagrada i naknada za policijske službenike za gore navedeni period.

Druga, pošto smo ovih dana svjedoci u medijima a evo već smo i dobili neke informacije ali nisu te koje nas interesuju. Zadnjih nekoliko sjednica u medijima možemo vidjeti informacije oko poslovanja JKP Skenderija i ZOI 84 te problema koje ta preduzeća imaju, posebno su ti problemi izraženi kako mediji navode u neplaćanju zakupnina za iznajmljene prostore zbog kojih ova preduzeća imaju ozbiljne probleme. Molim Vladu da mi dostavi spisak i ugovore svih korisnika koji su iznajmili prostore u ova dva JKP, zatim spisak svih dužnika imenom i prezimenom, sa ukupnim dugovanjima, kao i informaciju šta je menadžment ovih preduzeća poduzeo u naplati dugovanja. Ove informacije će pomoći nama zastupnicima a i medijima da imamo pravu sliku stanja u ovim preduzećima. Ko iznajmljuje prostore, pod kojim uslovima, a posebno da znamo ko su dužnici imenom i prezimenom. Neku večer sam kao o kolege šefovi klubova bili na javnoj tribini u Opštini Novo Sarajevo gdje smo imali priliku a odgovaramo na pitanje naših građana a organizovao je Centar civilnih inicijativa. Jedno od pitanja koje nije dozvoljeno gđinu Šefiku da postavi zato što se govori o čovjeku koji tu nije prisutan, ali to zato nije sprječavalo druge kolege da govore također o ljudima koji nisu tu, ali evo ja sam obećao i pozvao sam gđina Šefika u Klub SDP-a da postavi pitanje i nadam se da će premijer na ovo pitanje odgovoriti a da će gospodin Šefik biti zadovoljan. Premijer Vlade Kanton Sarajevo u svom inaoguracionom govoru obećao borbu protiv korupcije. Šta će premijer učiniti u slučaju nepotizma ministra za stambena pitanja gđina Čedomira Lukića koji je nezakonito zaposlio cijelu svoju familiju na ključnim mjestima u raznim institucijama o čemu je opširno pisao Dnevni avaz a gospodin Lukić nije demantovao? U prilogu imam rukopis dotičnog gđina i u prilogu dostavit ću ovih ostalih pet, šest pitanja koji se tiču uglavnom Zakona o održavanju zajedničkih dijelova zgrada.”

Poslanik Eldar Čomor je imao kratku intervenciju i zatražio je tumačenje Poslovnika od sekretara Skupštine gospodina Abida Kolašinca, koji mu je promptno dao odgovor.

Poslanik Segmedina Srna Bajramović je pokrenula inicijativu i postavila poslaničko pitanje:

“Najprije ću krenuti od inicijative prema Ministarstvu zdravstva, odnosi se na izmjene i dopune uredbe o ortopedskim pomagalicama. I to konkretno u dijelu koji se odnosi na obim, uvjete i način ostvarivanja prava osiguranih lica, tačnije djece s oštećenjem sluha kojoj je operativnim zahvatom montiran tzv kohlearni aparat. Postojeća uredba u Kanton Sarajevo ne osigurava naime niti potreban minimum osnovnih prava za djecu sa ugrađenim kohlearnim implantatom, dok za djecu sa oštećenjem sluha postojeća prava svakako nisu dostatna. Moram pojasniti ako mi dozvolite, a to je nešto što sam i sama tek naučila. Kohlearni implantat je dakle slušno pomagalo koje se implantira gluhim osobama sa velikim oštećenjem sluha kojima obični slušni aparati ne mogu biti od pomoći. Premda ljekari vole kazati da se ovo pomagalo implantira, suština je da se radi o ozbiljnom operativnom zahvatu. Njegovom ugradnjom uništi se ostatak prirodnog sluha koje dijete ima na tom uhu. I smatram važnim reći da se ugradnjom jednog tako skupog aparata u dječiju glavicu djetetu ograničavaju igre koje bi uključivale padanje, igranje, spuštanje niz tobogan zbog statičnog elektriciteta koji bi mogao oštetiti aparat, vožnju liftom plivanje itd. Kada se naime aparat pokvari a roditelj skuplja novac da ga popravi dijete ostaje potpuno gluho i isključeno iz ovoga svijeta. Mjesečni trošak samo za nabavku baterije je od 60 do 70 KM ovisno od starosti korisnika dužine korištenja implantata, starosti aparata. Najjeftiniji rezervni dio za implantat je kabl koji košta 120 KM a kompletan vanjski dio košta oko 25.000 KM. U BIH trenutno ne postoji mogućnost njegovog osiguranja od kvara ,krađe i slično. Dakle predmet moje inicijative je da se implantiranim osobama, djeci tačnije, osigura minimum prava na način da se osigura određeni postotak učešća ZZO u troškovima servisiranja aparata i rezervnih dijelova i refundiraju u cjelosti troškovi nabavke baterija. Za kraj moram napomenuti još da je kohlearni implantat ukoliko djeca nemaju i neke druge poteškoće uz pravilnu rehabilitaciju on garantira veliku mogućnost za gluha djecu da kasnije žive samostalno i rade te tako osiguraju egzistenciju bez da koriste neke socijalne programe. Na žalost, okolnosti su takve da je odgovor uz svaki zahtjev i svačije potrebe da za implementaciju postojećih strategija i konvencija nema novaca, ali ne smijemo zaboraviti da se dijete sa posebnim potrebama, sa poteškoćama u razvoju može desiti bilo kada i bilo kome. Stoga se nadam pozitivnom odgovoru iz Ministarstva zdravstva u svakom slučaju.

Imam jedno pitanje. Kako je moguće da Kantonalna Vlada razriješi dva člana UO KCUS ako je članom 64. Zakona o zdravstvenoj zaštiti propisano da predsjednika i članove UO ovih zdravstvenih ustanova imenuje i razrješava Vlada FBiH na prijedlog federalnog ministra.”

Poslanik Branislav Crnogorac je postavio sljedeće poslaničko pitanje:

“Imam samo jedno pitanje ono je upućeno ministru obrazovanja isto glasi: na temelju kojeg člana Zakona o visokom obrazovanju ili zakona o javnim ustanovama su imenovani prorektori UNSA? Budući da ovaj univerzitet nije integriran i na njega se ne mogu primjenjivati odredbe o integriranom univerzitetu.”

Poslanik Naser Nabil je postavio sljedeća poslanička pitanja:

“Vi znate da sam više puta problematizirao pitanje Centra Skenderije i dan danas opet ponavljam Skenderija, Skenderija, na žalost ministar za privredu gospodin Hrenovica ne vidim ga da je tu, mada bi trebao da bude tu, situacija u Skenderiji je veoma alarmantna nakon urušavanja ledene dvorane i nakon što je sada garaža već potpuno nefunkcionalna, mi imamo više od 15.000 kvadratnih metara van funkcije. A isto tako 130 uposlenika Centra Skenderije već tri mjeseca, ovo je treći mjesec kako ne primaju svoje plaće. Dakle, pročitao sam da je već napravljen elaborat koji je koštao 22 ili 23.000 maraka, i neki program sanacije ali ne vidim ništa konkretno da se dešava da se to sanira. Da li mi očekujemo da dođe do ljudskih žrtava, u samom centru Skenderije pa da imamo ne daj Bože dvadesetak, tridesetak mrtvih pa da onda skontamo da treba sanirati Skenderiju. Skenderija je simbol grada, simbol Kantona, nosi ime jednog velikana između ostalog i ja bih vas molio zaista i premijera i uvaženog ministra da podhitno podsjetite tu Skenderiju, eno je preko puta nas, i da vide u čemu je problem i kako se zaista može pomoći toj ustanovi. To je jedna stvar. Druga stvar primijetio sam već dugo vremena mi smo imali ovdje nacrt zakona o održavanju čistoće i upravljanju komunalnim otpadom koji je bio u oktobru 2011 godine na javnoj raspravi i više se gubi svaki trag. I isto tako je bio ovdje Nacrt zakona o izmjenama i dopunama Zakona o imovini Kanton Sarajevo i to je bilo u javnoj raspravi i opet negdje u ladici i nema ga kao u vidu prijedloga na Dnevnom redu Skupštine. Pa ja vas molim šta je sa tim zakonima? Hoćemo li ih imati na dnevnom redu ikada?”

Poslanik Hadžem Hajdarević je postavio poslaničko pitanje i pokrenuo je inicijativu:

“Pitanje zapošljavanja i posla je jedno od najtraumatičnijih pitanja kod nas. Da li u kuloarima ili pričama kruže informacije da je dosta osoba zaposleno u ministarstvima u Kanton Sarajevo nakon inauguriranja ove Vlade. Zato pitam koliko je novih uposlenika u ministarstvima, posebno koliko je savjetnika došlo novih ministara, i bilo bi dobro da ta pitanja ne dođu samo meni kao zastupniku nego da dođu svim zastupnicima ovdje prisutnim i da se vidi koliko je koji ministar zaposlio savjetnika i koliko je na kraju krajeva došlo novih osoba u Kantona Sarajevo u smislu stalnog ili privremenog zaposlenja?

Drugo je inicijativa. Svjedoci smo da u posljednje vrijeme sigurnosna situacija u Kanton Sarajevo je veoma teška. Traumatična, isto tako svjedoci smo sa kolikim se entuzijazmom i energijom sadašnji ministar MUP-a zalagao i kao zastupnik i kao ministar da se to pitanje riješi pa bih ovdje pozvao dao bih inicijativu odnosno podržao bih ono što je ranije govorio ministar Nermin Pećanac kao zastupnik da se u što skorije vrijeme održi vanredna sjednica Skupštine o sigurnosnoj situaciji u Kanton Sarajevo i bojim se da sva ova priča o sigurnosti ne bude samo medijska priča jer na kraju krajeva sa riječi je vrlo bitno preći na djelo. Nekoliko puta bio sam u prilici da gledam ministra Pećanca na TV da čitam njegove intervjuje, dosta ohrabrujuće, u svakom slučaju nešto što treba pozdraviti, ali u svakom slučaju situacija je takva da je u posljednja dva mjeseca urađeno kriminalnih radnji, više napada, više prepada, više nasilničkih ponašanja nego recimo u šest mjeseci ili godinu dana u vrijeme bivšega ministra. U tom smislu smatram vrlo važnim, bitnim, gotovo pa alarmantnim, da se Skupština ovdje organizira u što skorije vrijeme, da se održi sjednica po pitanju sigurnosti u Kanton Sarajevo i nadam se da će u tom smislu uvaženi ministar Pećanac dati svoj puni prilog, na kraju krajeva da nam svima bude ljepše i ugodnije živjeti.”

Poslanik Faruk Efendić je postavio sljedeća poslanička pitanja:

“Ja ću postaviti dva pitanja obadva pitanja upućujem resornom Ministarstvu unutrašnjih poslova, odnosno ministru. Putem javnih medija informirani smo da je policija Kanton

Sarajevo, nedavno izvršila akciju u kojoj su uhapšene neke osobe zbog nezakonitoga i nasilničkog ponašanja. Kako smo svjedoci da je sigurnost u Sarajevu danas manja nego prije mjesec dana molimo ministra MUP-a da nas informira protiv koliko osoba su podnesene krivične prijave, koliko je tih krivičnih prijava Tužilaštvo Kantona potvrdilo i prihvatilo kao relevantne i koliko je osoba ostalo do danas lišenih slobode. Mislím da ne smijemo prihvatiti da nam se baca prašina u oči i da Ministarstvo pompeznim akcijama prikriva svoj nerad i neznanje.

Drugo pitanje da li je tačno da je izgradnja objekta za smještaj jedinice za specijalističku podršku u Nahorevu izvršena uz rekordnih devet aneksa ugovora, što izaziva sumnju na teška krivična djela, te da li je tačno da izgradnja objekta koja je trajala od 2005 do 2008 godine izvođena bez propisanih dozvola posebno bez prethodno riješenih imovinsko pravnih odnosa? Te da li je tačno da objekat zbog toga nikada nije ni dobio potrebnu dozvolu? Koristi se još od augusta 2008 godine, što sigurno ugrožava i živote i imovinu. Stoga molim da se dostave ugovori i aneksi ugovora sa svom zakonski propisanom dokumentacijom, te podatke o članovima komisija i firmama koje su izvodile te radove.”

Poslanik Munir Talović je pokrenuo inicijativu:

“Ono što želim da kažem, na početku bih podržao ovu inicijativu uvaženih zastupnika Konakovića, Alića i drugih koji govore o dugo godina pokretanju inicijative za treći čas tjelesnog odgoja koji je već u svim susjednim zemljama borba za četvrti, peti, a kod nas je još uvijek u pitanju da li je neophodan treći čas. Proširio bih je i na akademsku zajednicu jer UNSA sada ima sedam fakulteta koji imaju tjelesni odgoj i svi ostali nemaju obavezu. Samim tim nemaju tjelesni odgoj zato što je to malo teže organizirati, jer trebaju koristiti neku dvoranu i sale. Prema tome to je sastavni dio opće kulture i zdravlja i svega onoga što na kraju nam dođe kao najskuplja faktura.

Na početku ću se zahvaliti trima institucijama, to je Ministarstvo za obrazovanje, nauku i mlade, Dobrinjska gimnazija i zaštitarska agencija Securitas jer njihovim angažmanom i donacijama FASTO ima sada video nadzor, ima sistem za protiv požarnu i protiv provalnu zaštitu, i to je jedan jako dobar primjer saradnje institucija koje su iz sredstava donacije i Securitas iz ličnih sredstava napravili jedan jako dobar projekat, koj i preporučujem i ostalim institucijama. Ono što ću sada reći, kao jednu inicijativu, koja nije nepoznata ovom skupu ovdje, jer prof Vajzović je govorila i ja sam i još neki zastupnici ranije smo govorili, a u nastupima uvaženog ministra Marjanovića vidim da je on spreman za inicijative i konstruktivne prijedloge pa sam siguran da će mu i ovo koristiti kako bi smo mijenjali postojeću praksu koja nije baš, siguran sam, u praksi baš najbolje rješenje kada su u pitanju kriteriji za raspodjelu materijalnih sredstava na UNSA po fakultetima. Imamo činjenicu da fakulteti koji imaju sto i više uposlenika egzistiraju na fakultetima koji imaju manju ili dovoljnu kvadraturu za njih i po tom principu 10% od glavarine. Oni dobiju značajna sredstava. I imamo fakultete koji imaju manji broj uposlenika 10% ili sada nije dovoljno da pokriju djeliće sredstava za materijalne troškove, ne ulazeći u stvarne potrebe. Da ne govorim sada samo kao predstavnik FASTO. Mi imamo 9000 kvadrata koje trebamo grijati, visine u prosjeku 20 metara, što se apsolutno ne može porediti niti sa jednom institucijom koja grije visinu od 2,5 kvadratna metra. Želim da se zahvalim premijeru Zeljkoviću i ministru Marjanoviću koji su došli u posjetu FASTO i sada oni znaju o čemu pričam. Naravno, ministar Šarić je više puta bio i siguran sam sada da će oni u svojoj projekciji praviti bez

mojih inicijativa završetak bazena na FASTO. Završit ću sa još jednom nadopunom ove inicijative da ministar Marjanović možda sakupi podatke o opterećenost nastavnika na fakultetima jer na to nas obavezuju standardi koje je Ministarstvo dalo već 2005, 2006 godine i tada ćete imati ukupnu sliku koliko su nastavnici, procentualno opterećeni na fakultetima i imat ćete ukupnu sliku koliko je potreba kojem fakultetu po procentu opterećenosti. Vidjet ćete da neki fakulteti imaju nastavnike koji predaju po 1 čas ili 2 u jednom semestru u drugom semestru nemaju opterećenja i vidjet ćete fakultete koji imaju opterećenost do granice kažnjivosti, preko 100% opterećenja ide kazna od 5.000 KM dekanu do 15.000 KM fakultetu. Prema tome i to je još jedan pokazatelj kako nagrađujemo one koji imaju i na neki način kažnjavamo po dva osnova oni koji su malobrojni i koji nemaju. Ja sam siguran da će uvaženi ministar Marjanović ove činjenice rabiti u svom daljnjem nastojanju da poboljša praksu na UNSA. Ne tražim kao inicijativu da mi se da odgovor nego pokrećem inicijativu da se sastave relevantni činioци koji mogu da sakupe podatke kako bi smo sigurno izašli bolji iz ove situacije koja je na nekim fakultetima na ivici egzistencije.”

Poslanik Edina Papo je postavila sljedeća poslanička pitanja:

“Moje prvo pitanje bi bilo u skladu ovih postavljenih pitanja u toku ovog današnjeg sata koji se odnose na ov zapošljavanje, ko kako gdje, kada, zašto? Pa bih postavila pitanje ministru za obrazovanje nauku i mlade, postavljam sljedeće pitanje. Da li je tačno da gđa Zlata Hašimbegović šefica Ureda za kvalitet Kanton Sarajevo dok je obavljala funkciju predsjednice UO JU Fakultet zdravstvenih studija u tu javnu ustanovu zaposlena njena kćerka, Selma Hašimbegović – Ibrahimović u statusu asistenta na predmetu Primjenjena epidemiologija u okolinskom zdravlju? Ovo pitanje postavljam ministru pogotovo iz razloga što ako je ovo tačno onda je ovo primjer zloupotrebe položaja koja je sukob interesa, pa možda i korupcije na neki način o kojem sam čula neki dan gdina ministra na jednoj TV emisiji da je vrlo lijepo govorio. Dakle, da mi gospodin premijer Kantona i ministar obrazovanja nauke i mladih adekvatno odgovore i reaguju. Za pretpostaviti je da su im ove činjenice bile poznate, da sigurno ne bi ponovno gđu Hašimbegović vratili na mjesto predsjednice UO fakulteta, kao što je to uradila Vlada na svojoj 4. sjednici održanoj 20.12. o.g. od uvaženog ministra gdina Marjanovića tražim usmeni odgovor ako je moguće. Teška su vremena, teško je dobiti radno mjesto, vrlo dobro znamo koliko naših divnih, zlatnih studenata ne radi.

Još jedno poslaničko pitanje, uvaženog ministra zdravstva gdina Lokmića i uvaženog direktora ZZO Kanton Sarajevo, gdina Gavrankapetovića pitam kako je moguće i ko će snositi odgovornost da nakon nezakonito donesene odluke Vlade Kanton Sarajevo o razrješenju članova UO ZZO, a koje je urađeno 06.12. o.g. razriješeni članovi nisu do 24.12. o.g. primili rješenje o razrješenju. Očigledno je da je u tih 18 dana Vlada na neki način kupovala vrijeme da postavi nove, a dijelom i vrati stare članove, sada sve kao vršioce dužnosti, a istovremeno u tom vremenu onemoguću pravo na žalbu i pokretanje postupaka zaštite pred nadležnim institucijama nezakonito razriješenim članovima ovog tijela. Od uvaženih tražim i usmeni i pismeni odgovor.”

Dopredsjedavajući Ivan Brigić je pokrenuo inicijativu:

“Iskoristit ću priliku pošto je se premijer vratio, a nekoliko je zastupnika prije mene govorilo o ustavnim amandmanima, koliko se sjećam Peđa Kojović, Segmedina Srna, Nedžad Fazlija, Dino Konaković, a premijer nije bio čitavo vrijeme prisutan, pa koristim priliku da kažem nekoliko riječi i sugestija kao inicijativu. Sve su predradnje za usvajanje ustavnih amandmana

završene. Obavljena je javna rasprava, komisija je napravila izvještaj o javnoj raspravi, naznačila šta je prihvatila, šta nije prihvatila, zašto nije prihvatila, Vlada je to usvojila u starom sastavu, što ne znači da je ova Vlada obavezna to isto da uradi. Ja samo sugerišem premijeru da to stavi ponovo na dnevni red, da se Vlada očituje radi toga što za usvajanje amandmana treba dvotrećinska većina. U pravilu, u ovakvim pitanjima se u svim parlamentarnim demokratijama odlučuje konsenzusom. Takav konsenzus je postojao ranije, ja ne znam da li još uvijek postoji, što se tiče ovih koji su učestvovali u pripremi amandmana, kod njih postoji i amandmani treba da idu na Skupštinu kada se obezbijedi konsenzus, odnosno dvije trećine. A ovo govorim radi toga nema razloga da mi ne ostvarimo onaj cilj koji smo imali, da budemo prvi Kanton u BiH koji će pod firmom provedbe Konvencije o zaštiti ljudskih prava i sloboda, ustvari provesti odluku i Suda u Strazburu u predmetu Sejdić – Finci i pokazati da se to može riješiti na jedan korektan ustavan način štiteći slobode i temeljna prava ljudi koji su garantovani u Konvenciji. Zato se mi u obrazloženju tih amandmana pozivamo i na konvenciju o zaštiti ljudskih prava. Pa samo je ovo inicijativa prema Vladi da to ponovo stavi na dnevni red, da se očituje i da možemo relativno brzo na Skupštini usvojiti prijedloge ustavnih amandmana.”

Poslanik Amir Zukić je pokrenuo inicijative:

“Uputio bih inicijativu da Skupština Kantona Sarajevo i Vlada uključe se u humanitarnu akciju pomoći devetogodišnjoj djevojčici Iman Džaki koja boluje od rijetke bolesti. Pozivam i ostale građane Kantona da se uključe u akciju. Informacije mogu pročitati na web portalu TVSA.

Drugu inicijativu bih uputio u razgovoru s ministrom obrazovanja vidio sam da on razumije taj problem, ali evo i kroz javnost da mu pomognemo, a to je da djeci u osnovnim školama, prvo olakšamo školsku torbu i rasteretimo školski program. Udžbenike koji su jako nezgrapno napisani, i imamo djecu kojoj bi trebali da obezbijedimo sretno djetinjstvo i sa ovakvim školskim programom i reformama, mislim da idemo u kontra smjeru. Imali smo jedan dobar obrazovni sistem kroz reforme mislim da idemo u krivom sistemu. Kroz razgovor s ministrom sam shvatio da on evidentira problem. Na ovaj način mu pomažem i nudimo se da svi učestvujemo u tome da naročito osnovu školu rasteretimo udžbenika nepotrebnog sadržaja, viška predmeta. Nastavni kadar da rasteretimo pisanja nepotrebnih izvještaja jer ne mogu da se posvete dovoljno edukaciji, pripremi djece da saVladaju školski program. I djeca nespremna dolaze kući i imamo praksu da djeci moramo u OŠ davati instrukcije iz određenih predmeta da dajemo da bi mogli saVladati. To nam nešto ukazuje da idemo u krivom smijeru ako djelujemo možemo to ispraviti.

I treće, ja upućujem ovih dana, primijeti se ustvari vidno prisustvo pripadnika MUP-a na cijeloj teritoriji Kanton Sarajevo i želim da uputim pohvale, ja ovih dana na drugačiji način vidim sigurnosnu situaciju u Sarajevu. Ne može se ona za noć riješiti. Ni jedno društvo nije iskoristilo devijantno ponašanje, ali ovaj put na kojim se krenulo, mislim da je odraz dobre aktivnosti, dobre politike i sigurno treba da se nastavi i uvijek treba da je prisustvo policije, ono na taj način sprječava one koji žele da počine krivična djela i nastavite sa tom aktivnosti, normalno uz materijalnu podršku koju ćemo mi kroz budžet i Vlada dati, trebamo da se još snažnije obračunamo sa svim onim koji pokušavaju da unesu nemir u našem gradu.”

Predsjedavajuća Mirjana Malić je pozvala ministre da ukoliko imaju potrebu daju usmene odgovore na pitanja poslanika.

Usmene odgovore na poslanička pitanja dali su ministar kulture i sporta Ivica Šarić, ministar prostornog uređenja i zaštite okoliša Zlatko Petrović, ministar za obrazovanje, nauku i mlade Damir Marjanović i ministar privrede Emir Hrenovica. Nakon obraćanja ministara uslijedila je rasprava u kojoj su poslanici učestvovali sa poslovnim intervencijama. U diskusiji oko nejasnoća u pogledu tumačenja Poslovnika Skupštine učestvovali su dopredsjedavajući Kemal Ademović, Nedžad Fazlija, poslanik Predrag Kojović, poslanik Naser Nabil, poslanik Adnan Solaković, poslanik Elmedin Konaković, poslanik Zaim Backović i sekretar Skupštine Abid Kolašinac koji je u okviru svojih nadležnosti pokušao dati pojašnjenja.

AD – 2.

PRIJEDLOG ZAKONA O JAVNIM SKIJALIŠTIMA

Prijedlog ovog Zakona poslanici su dobili uz poziv za sjednicu.

Ministar kulture i sporta Ivica Šarić podnio je uvodne napomene i one su u prilogu stenograma.

Pitanja za ministra kulture i sporta imali su Zaim Backović i Besim Mehmedić i na njihova pitanja ministar Šarić je odmah dao odgovor.

U konstruktivnoj diskusiji po ovom Prijedlogu zakona, učestvovali su sljedeći poslanici: Segmedina Srna, Elmedin Konaković, Besim Mehmedić, Zaim Backović i Branislav Crnogorac.

NAKON DISKUSIJE 32 POSLANIKA SU PRISTUPILA GLASANJU I SKUPŠTINA JE JEDNOGLASNO DONIJELA ZAKON O JAVNIM SKIJALIŠTIMA.

AD – 3.

NACRT ZAKONA O IZMJENAMA ZAKONA O KONCESIJAMA

Nacrt ovog Zakona poslanici su dobili uz poziv za sjednicu.

Uvodno izlaganje ministra privrede Emira Hrenovica je u prilogu stenograma.

Poslanik Nedžad Fazlija je bio jedini poslanik koji je postavio pitanje za ministra privrede otvaranja rasprave.

Predsjedavajuća je konstatovala da prijavljenih za pitanja više nema, pa je otvorila raspravu po ovom Nacrtu zakona.

Poslanik Elmedin Konaković bio je prvi učesnik u raspravi, a nakon njega u raspravu su se uključili poslanik Naser Nabil i poslanik Eldar Čomor.

Predsjedavajuća je konstatovala da prijavljenih za raspravu više nema, pa je predložila da Skupština po ovom Nacrtu zakona donese zaključke i Skupština je sa 30 glasova ZA, jednoglasno donijela sljedeće ZAKLJUČKE:

1. Utvrđuje se Nacrt zakona o izmjenama Zakona o koncesijama.
2. Javna rasprava održaće se u Kantonalnim organima, jedinicama lokalne samouprave, naučnim i stručnim ustanova i trajaće 30 dana.
3. Primjedbe, prijedlozi, sugestije zastupnika i mišljenja radnih tijela Skupštine dostavljaju se Vladi Kantona Sarajevo koja organizuje i provodi javnu raspravu.
4. Vlada Kantona Sarajevo dužna je da nakon provedene javne rasprave podnese Skupštini Izvještaj o rezultatima javne rasprave koji sadrži primjedbe, prijedloge i mišljenja, kao i da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Prijedloga zakona o izmjenama Zakona o koncesijama.

AD – 4.

PRIJEDLOG ODLUKE O PRIVREMENOM FINANSIRANJU POTREBA KANTONA SARAJEVO ZA PERIOD 01.01. DO 31.03.2013. GODINE

Prijedlog odluke poslanici su dobili uz poziv za sjednicu.

Predstavnik Vlade ministar finansija Muhamed Kozadra podnio je uvodne napomene po ovom Prijedlogu odluke.

Nakon uvodnih napomena ministra finansija uslijedila je konstruktivna i sadržajna diskusija u kojoj su se poslanici javljali po više puta, sa replikama i intervencijama, te dodatnim pitanjima za ministra finansija. U navedenoj diskusiji učestvovali su: poslanik Nedžad Fazlija, poslanik Predrag Kojović, poslanik Eldar Čomor, poslanik Elmedin Konaković, poslanik Mujo Hošić, poslanik Naser Nabil, poslanik Besim Mehmedić, poslanik Zaim Backović, dopredsjedavajući Kemal Ademović, poslanik Amir Zukić, dopredsjedavajući Ivan Brigić, predsjedavajuća Mirjana Malić, poslanik Enes Zeković i poslanik Mirsad Pindžo.

Poslanik Mirsad Pindžo predložio je da Skupština donese sljedeće Zaključke:

1. Da mi usvojimo Odluku o privremenom finansiranju jer nema niko pravo zaustaviti život i ugroziti sistem u Kanton Sarajevo, kako je Vlada predložila.
2. Drugi zaključak ako ga ne stavite na glasanje, ja to onda tražim kao zastupnik da Ministarstvo finansija dostavi cjelovitu informaciju upravo onoga što ej govorio ministar finansija samo sa dokumentima pa ćemo tada vidjeti je li bilo namjenskog trošenja, odnosno nenamjenskog, ko je davao odobrenja, ko to nije

sprječavao, odnosno ko je kršio Zakon. Moramo jednom početi pozivati na odgovornost.

3. I treći zaključak, da Vlada Kanton Sarajevo u što skorijem roku predloži Nacrt budžeta za 2013 godinu. Ali realan Nacrt budžeta, ostvariv, a ne šarene laže, jer nama ne treba budžet ako ćemo ga usvajati kao što je usvojen za 2012. pogledajte, hajmo. Da je stara Vlada ja bih predložio izmjenu odluke da ova odluka vrijedi za čitavu godinu, jer oni će trošiti kako i ne trošiti. Al evo sreća je nova je, ne zato što je ja podržavam, nego zato što nisu imali priliku da pokažu kako će se ponašati u narednom periodu i prema ovome što su poduzeli kao prvu mjeru u ograničavanju troškova pokazuju da su ozbiljniji od ovih prethodnih. Hvala lijepo.

Predsjedavajuća je konstatovala da prijavljenih za raspavu više nema, pa je pozvala ministra finansija Muhameda Kozadru da se obrati Skupštini.

Nakon obraćanja ministra Kozadre, predsjedavajuća je konstatovala da se navedeni zaključci poslanika Mirsada Pindže moraju formulisati te dostaviti svim poslanicima i da će tako doći na glasanje.

NADALJE, PREDSDJEDAVAJUĆA JE POZVALA POSLANIKE DA PRISTUPE IZJAŠNJAVANJU O PRIJEDLOGU ODLUKE O PRIVREMENOM FINANSIRANJU POTREBA KANTONA SARAJEVO ZA PERIOD 01.01. DO 31.03.2013. GODINE.

GLASANJU SU PRISTUPILA 33 POSLANIKA I SKUPŠTINA JE JEDNOGLASNO DONIJELA ODLUKU O PRIVREMENOM FINANSIRANJU POTREBA KANTONA SARAJEVO ZA PERIOD 01.01. DO 31.03.2013. GODINE.

USLIJEDILA JE PAUZA U RADU SKUPŠTINE DO 16.00 SATI

AD – 5.

PRIJEDLOG ODLUKE O DAVANJU GARANCIJE U IME KJKP “SARAJEVOGAS” D.O.O. SARAJEVO U VISINI RAZLIKE FAKTURISANOG I PLAĆENOG IZNOSA MJESEČNE POTROŠNJE PREMA BH GASU D.O.O. SARAJEVO

Prijedlog ove odluke poslanici su dobili uz poziv za sjednicu.

Ministar Muhamed Kozadra i ministar Zlatko Petrović su podnijeli uvodne napomene po ovom Prijedlogu odluke i nakon njihovog obraćanja Skupštini pojedini poslanici su postavili pitanja za ministre. Poslanici koji su postavili pitanja su bili sljedeći: Predrag Kojović, Nedžad Fazlija i Naser Nabil.

Nakon rješavanja problema sa tehnikom u sali Skupštine, predsjedavajuća je konstatovala da prijavljenih za pitanja nema, pa je otvorila raspravu po ovom Prijedlogu odluke.

U konstruktivnoj raspravi po ovom Prijedlogu odluke učestvovali su sljedeći poslanici: Zaim Backović, Mujo Hošić i Besim Mehmedić.

PREDSJEDAVALA JE KONSTATOVALA DA NEMA PRIJAVLJENIH POSLANIKA ZA DISKUSIJU, PA JE ZAKLJUČILA RASPRAVU I POZVALA POSLANIKE DA PRISTUPE IZJAŠNENJU O PRIJEDLOGU ODLUKE O DAVANJU GARANCIJE U IME KJKP "SARAJEVOGAS" D.O.O. SARAJEVO U VISINI RAZLIKE FAKTURISANOG I PLAĆENOG IZNOSA MJESEČNE POTROŠNJE PREMA BH GASU D.O.O. SARAJEVO.

GLASANJU JE PRISTUPIO 31 POSLANIK I SKUPŠTINA JE JEDNOGLASNO DONIJELA ODLUKU O DAVANJU GARANCIJE U IME KJKP "SARAJEVOGAS" D.O.O. SARAJEVO U VISINI RAZLIKE FAKTURISANOG I PLAĆENOG IZNOSA MJESEČNE POTROŠNJE PREMA BH GASU D.O.O. SARAJEVO.

AD – 6.

PRIJEDLOG ODLUKE O ZAŠTITI I POBOLJŠANJU KVALITETA ZRAKA U KANTONU SARAJEVO

Prijedlog odluke poslanici su dobili uz poziv za sjednicu.

U diskusiji po ovoj tački dnevnog reda učestvovali su sljedeći poslanici: Besim Mehmedić, Naser Nabil, Branislav Crnogorac, Adnan Solaković, Nedžad Fazlija i Zaim Backović. Poslanici su u navedenoj diskusiji dali svoje komentare i postavili pitanja za ministra prostornog uređenja i zaštite okoliša Zlatka Petrovića. Nakon zaključene rasprave Skupštini se obratio ministar Zlatko Petrović.

PREDJSEDAVALA JE POZAVALA POSLANIKE DA PRISTUPE IZJAŠNJAVANJU O PRIJEDLOGU ODLUKE O ZAŠTITI I POBOLJŠANJU KVALITETA ZRAKA U KANTONU SARAJEVO.

GLASANJU JE PRISTUPILO 28 POSLANIKA I SKUPŠTINA JE JEDNOGLASNO DONIJELA ODLUKU O ZAŠTITI I POBOLJŠANJU KVALITETA ZRAKA U KANTONU SARAJEVO.

Predsjedavajuća je informisala poslanike da su predloženi zaključci poslanika Mirsada Pindže formulisani te da će isti biti dostavljeni poslanicima kako bi se o njima izjasnili.

Uslijedila je realizacija tačke 7.

AD- 7

PRIJEDLOG ODLUKE O DAVANJU SAGLASNOSTI NA ODLUKU O PRIVREMENOM FINANSIRANJU ZAVODA ZDRAVSTVENOG OSIGURANJA KANTONA SARAJEVO ZA PERIOD OD 01.01. DO 31.03.2013. GODINE;

AD – 8

PRIJEDLOG ODLUKE O DAVANJU SAGLASNOSTI NA IZMJENE I DOPUNE FINANSIJSKOG PLANA ZAVODA ZDRAVSTVENOG OSIGURANJA KANTONA SARAJEVO ZA 2012. GODINU;

AD - 9

PRIJEDLOG ODLUKE O DAVANJU SAGLASNOSTI NA IZMJENE I DOPUNE PLANA KAPITALNIH ULAGANJA ZAVODA ZDRAVSTVENOG OSIGURANJA KANTONA SARAJEVO U JAVNIM ZDRAVSTVENIM USTANOVAMA ZA PERIOD 2011-2013 GODINA

Predsjedavajuća je informisala da poslanici pred sobom imaju tri tačke koje se odnose na Odluku o privremenom finansiranju Zavoda zdravstvenog osiguranja Kantona Sarajevo, Plan izmjena i dopuna finansijskog plana ZZO i Saglasnost na izmjene dopuna plana kapitalnog ulaganja ZZO. Nadalje, predsjedavajuća je dobila saglasnost Skupštine da se u raspravi objedine tačke 7,8 i 9, ali da se o njima pojedinačno izjašnjava.

Ministar zdravstva Eldan Lokmić obratio se Skupštini i u svom izlaganju šire je elaborirao predložene tri tačke.

Nakon uvodnog izlaganja ministra zdravstva uslijedila je sadržajna i konstruktivna rasprava u kojoj su poslanici šire elaborirali svoje stavove, te postavili dodatna pitanja oko nejasnoća koje su imali. U navedenoj diskusiji su učestvovali sljedeći poslanici: Naser Nabil ,Mujo Hošić, Elmedin Konaković, dopredsjedavajući Kemal Ademović, Besim Mehmedić, Amir Zukić, Adnan Solaković, Enes Zeković, Segmedina Srna, Nedžad Fazlija, Damir Čardžić, Branislav Crnogorac.

Predsjedavajuća je konstatovala da prijavljenih diskutanata više nema, pa je zaljučila raspravu i pozvala ministra Lokmića da se obrati Skupštini.

AD – 7.

PREDSJEDAVAJUĆA JE POZVALA POSLANIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA ODLUKU O PRIVREMENOM FINANSIRANJU ZAVODA ZDRAVSTVENOG OSIGURANJA KANTONA SARAJEVO ZA PERIOD OD 01.01. DO 31.03.2013. GODINE.

GLASANJU JE PRISTUPIO 31 POSLANIK I SKUPŠTINA JE VEĆINOM GLASOVA (27 ZA I 4 PROTIV) DONIJELA ODLUKU O DAVANJU SAGLASNOSTI NA ODLUKU O PRIVREMENOM FINANSIRANJU ZAVODA ZDRAVSTVENOG OSIGURANJA KANTONA SARAJEVO ZA PERIOD OD 01.01. DO 31.03.2013. GODINE.

AD – 8.

PREDSJEDAVAJUĆA JE POZVALA POSLANIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA IZMJENE I DOPUNE FINANSIJSKOG PLANA ZAVODA ZDRAVSTVENOG OSIGURANJA KANTONA SARAJEVO ZA 2012. GODINU.

GLASANJU JE PRISTUPILO 30 POSLANIKA I SKUPŠTINA JE VEĆINOM GLASOVA (26 ZA,3 SUZDRŽANA I 1 PROTIV) DONIJELA ODLUKU O DAVANJU SAGLASNOSTI NA IZMJENE I DOPUNE FINANSIJSKOG PLANA ZAVODA ZDRAVSTVENOG OSIGURANJA KANTONA SARAJEVO ZA 2012. GODINU.

AD – 9.

PREDSJEDAVAJUĆA JE POZVALA POSLANIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA IZMJENE I DOPUNE PLANA KAPITALNIH ULAGANJA ZAVODA ZDRAVSTVENOG OSIGURANJA KANTONA SARAJEVO U JAVNIM ZDRAVSTVENIM USTANOVAMA ZA PERIOD 2011-2013 GODINA.

GLASANJU JE PRISTUPILO 25 POSLANIKA I SKUPŠTINA JE VEĆINOM GLASOVA (25 ZA,2 SUZDRŽANA I 4 PROTIV) USVOJILA ODLUKU O DAVANJU SAGLASNOSTI NA IZMJENE I DOPUNE PLANA KAPITALNIH ULAGANJA ZAVODA ZDRAVSTVENOG OSIGURANJA KANTONA SARAJEVO U JAVNIM ZDRAVSTVENIM USTANOVAMA ZA PERIOD 2011-2013 GODINA.

Predsjedavajuća je konstatovala da je preostalo još deset tačaka dnevnog reda i predložila je da se poslanicima ograniči diskusija na 5 minuta.

**NA ZAHTJEV KLUBA POSLNIKA SDP-A
USLIJEDILA JE PAUZA U RADU SKUPŠTINE OD 30 MINUTA**

Nakon pauze predsjedavajuća Mirjana Malić je konstatovala da postoji kvorum za nastavak sjednice, te je zatražila obrazloženje zahtjeva za pauzu od strane predsjednika Kluba SDP. Poslanik Nedžad Fazlija je dao kratko obrazloženje.

Predsjedavajuća je pozvala poslanike da se izjasne o zaključcima predloženim od strane poslanika Mirsada Pindže. Glasanju su pristupila 22 poslanika i Skupština je većinom glasova (20 za i 2 suzdržana) donijela sljedeće ZAKLJUČKE:

1. Zadužuje se Vlada Kantona Sarajevo da u što kraćem roku pripremi, sa aspekta prihoda, realan i ostvariv Nacrt Budžeta Kantona Sarajevo za 2013. godinu.

2. Zadužuje se Ministarstvo finansija Kantona Sarajevo da sačini cjelovitu informaciju o stanju Budžeta Kantona Sarajevo na dan 21.11.2012. godine o stvorenim obavezama, detaljno po svim budžetskim korisnicima, te procjenom obaveza koje će nastati do kraja budžetske godine u skladu sa odlukom o privremenoj obustavi izvršavanja pojedinih rashoda.

AD – 10.

PRIJEDLOZI ODLUKA O IZMJENAMA ODLUKE O PREUZIMANJU PRAVA OSNIVAČA:

- a) Javne ustanove „Narodno pozorište Sarajevo“
- b) Javne ustanove „Sarajevska filharmonija“.
- c) Javne ustanove „Pozorište mladih“ Sarajevo;
- d) Javne ustanove „Kamerni teatar 55“ Sarajevo;
- e) Javne ustanove „Sarajevski ratni teatar – SARTR“.
- f) Javne ustanove „MESS -Međunarodni teatarski i filmski festival Sarajevo“;
- g) Javne ustanove „Muzej Sarajeva“;
- h) Javne ustanove „Kantonalni zavod za zaštitu kulturno-historijskog i prirodnog naslijeđa Sarajevo“;
- i) Javne ustanove „Historijski arhiv Sarajevo“;
- j) Javne ustanove „Collegium artisticum“ Sarajevo;
- k) Javne ustanove „Biblioteka Sarajeva“;
- l) Javne ustanove „Bosanski kulturni centar“ Sarajevo;
- m) Javne ustanove za organizovanje kulturnih programa i međunarodnu saradnju u kulturi „Sarajevo art“;
- n) Javne ustanove Muzej „Alija Izetbegović“;

Predsjedavajuća Skupštine Mirjana Malić je konstatovala da se u osnovi svih odluka radi o mijenjanju ili usklađivanju dosadašnjih šifri djelatnosti i klasifikacije djelatnosti javnih ustanova iz oblasti kulture u skladu sa važećom Odlukom o klasifikaciji djelatnosti Bosne i Hercegovine 2010, pa je dala prijedlog da se obavi jedinstvena rasprava i da se u načelu glasa o svim ovim izmjenama. Predsjedavajuća je naglasila da će njen prijedlog o raspravi i glasanju za ovu tačku doći na izjašnjavanje tek nakon uvodnog izlaganja ministra kulture i sporta.

Ministar kulture i sporta Ivica Šarić se obratio Skupštini i podnio uvodne napomene po Prijedlozima odluka o izmjenama odluke o preuzimanju prava osnivača za javne ustanove iz oblasti kulture.

Nakon obraćanja ministra Šarića Skupština je prihvatila prijedlog predsjedavajuće da se obavi jedinstvena rasprava. Jedini prijavljeni poslanik za diskusiju bio je poslanik Elmedin Konaković.

Predsjedavajuća je konstatovala da 'prijavljenih više nema, pa je pozvala poslanike da se izjasne o prijedlogu da se glasanje obavi u paketu za sve javne ustanove iz oblasti kulture. Skupština je sa 28 glasova ZA prihvatila da se glasanje obavi zajednički.

SKUPŠTINA JE VEĆINOM GLASOVA (29 ZA I 1 SUZDRŽAN) USVOJILA IZMJENE U ŠIFRAMA DJELATNOSTI I KLASIFIKACIJAMA ZA SVE JAVNE USTANOVE IZ OBLASTI KULTURE.

AD – 11.

Prijedlog odluke o izmjeni Odluke o osnivanju Skupština javnih preduzeća čiji je osnivač Kanton Sarajevo i prijedloge odluka o izmjenama Odluka o usklađivanju statusa Kantonalnih javnih komunalnih preduzeća sa Zakonom o javnim preduzećima u Federaciji Bosne i Hercegovine i to:

Ja ih moram pročitati zato što se ona odnose na više resornih ministarstava. Dakle:

- a) "Vodovod i kanalizacija",
- b) „Rad“,
- c) „Park“,
- d) „Pokop“,
- e) „Sarajevogas“,
- f) „Toplane“,
- g) „Tržnice-pijace“,

pretpostavljam da je to sve u ingerenciji Ministarstva za prostorno uređenje

- h) "Kantonalna veterinarska stanica",
- i) "ZOI84",
- j) „PD Butmir“,
- k) Centar "Skenderija",
- l) „Sarajevo-šume“

u Ministarstvu privrede

m) "Gradski saobraćaj" - Ministarstvo saobraćaja

n) "Televizija Kantona Sarajevo" – u domenu ministarstva pravde

Predsjedavajuća je konstatovala da se svi prijedlozi odluka odnose na usklađivanje statusa Kantonalnih javnih komunalnih preduzeća sa Zakonom o javnim preduzećima u Federaciji Bosne i Hercegovine, odnosno na smanjenje broja članova Skupština preduzeća sa „četiri člana“ na „dva člana“ zbog efikasnijeg i ekonomičnijeg rada preduzeća, te je predložila da se obavi jedinstvena rasprava za sve podtačke, a potom da se izjašnjavanje za svako preduzeće obavi posebno. Skupština je prihvatila ovaj prijedlog.

Sve prijedloge odluka poslanici su dobili uz poziv za sjednicu. Amandman Kluba poslanika SDP-a po ovom Prijedlogu su dobili u dopunskom materijalu.

Predsjedavajuća Malić je pozvala premijera Suada Zeljkovića da se obrati Skupštini kako bi uz uvodne napomene dobili i izjašnjenje Vlade o podnesenom AMANDMANU KLUBA SDP.

Premijer Vlade Suad Zeljković se obratio Skupštini i u svom izlaganju šire elaborirao ove prijedloge odluka.

Nakon izlaganja premijera Suada Zeljkovića, pitanja su mu postavili sljedeći poslanici: Predrag Kojović, Nedžad Fazlija i Naser Nabil. Premijer Vlade je na pitanja poslanika odmah dao odgovore.

U diskusiji po ovim prijedlozima odluka učestvovali su sljedeći poslanici: Besim Mehmedić, Damir Čardžić, Elmedin Konaković, Naser Nabil, Branislav Crnogorac, Fazlija Nedžad, Zaim Backović, Faruk Efendić, Hadžem Hajdarević, Predrag Kojović i dopredsjedavajući Kemal Ademović. U toku diskusije predsjedavajuća Mirjana Malić je informisala poslanike da će sjednicu u nastavku voditi dopredsjedavajući Kemal Ademović

Dopredsjedavajući Kemal Ademović je konstatovao da više nema prijavljenih poslanika za raspravu, pa je zaključio raspravu te pozvao poslanike na izjašnjavanje o AMANDMANU KLUBA SDP-A.

Amandman 1

U Odluci o osnivanju Skupština javnih preduzeća, čiji je osnivač Kanton Sarajevo („Službene novine Kantona Sarajevo“, br. 25/09 i 22/11), član 2. stav (1) ostaje nepromijenjen.

ZA OVAJ AMANDMAN 11 POSLANIKA JE GLASALO ZA, UZDRŽAN JE BIO JEDAN POSLANIK I PROTIV JE BILO 18 POSLANIKA. OD UKUPNO 30 KOJIH JE GLASALO, 2 NISU GLASALA.

SKUPŠTINA NIJE PRIHVATILA OVAJ AMANDMAN.

UZ KONSULTACIJE SA SEKRETAROM SKUPŠTINE DOPREDSJEDAVALJUĆI KEMAL ADEMOVIĆ JE POZVAO POSLANIKE DA SE ZAJEDNIČKI IZJASNE O SVIM PRIJEDLOZIMA ODLUKA.

GLASANJU JE PRISTUPILO 30 POSLANIKA I SKUPŠTINA JE VEĆINOM GLASOVA (ZA 19,10 PROTIV I 1 UZDRŽAN) DONIJELA ODLUKE O IZMJENI ODLUKE O OSNIVANJU SKUPŠTINA JAVNIH PREDUZEĆA ČIJI JE OSNIVAČ KANTON SARAJEVO I PRIJEDLOGE ODLUKA O IZMJENAMA ODLUKA O USKLADIVANJU STATUSA KANTONALNIH JAVNIH KOMUNALNIH PREDUZEĆA SA ZAKONOM O JAVNIM PREDUZEĆIMA U FEDERACIJI BOSNE I HERCEGOVINE I TO:

- a) „Vodovod i kanalizacija“,
- b) „Rad“,
- c) „Park“,
- d) „Pokop“,
- e) „Sarajevogas“,
- f) „Toplane“,
- g) „Tržnice-pijace“,
- h) „Kantonalna veterinarska stanica“,
- i) „ZOI84“,
- j) „PD Butmir“,
- k) Centar „Skenderija“,
- l) „Sarajevo-šume“,
- m) „Gradski saobraćaj“,
- n) "Televizija Kantona Sarajevo"

AD – 12.

PRIJEDLOG ODLUKE O DAVANJU SAGLASNOSTI NA POSLOVNIK O RADU VIJEĆA NACIONALNIH MANJINA KANTONA SARAJEVO

Prijedlog odluke poslanici su dobili uz poziv za sjednicu.

Sekretar Abid Kolašinac se obratio Skupštini i podnio uvodne napomene po ovom Prijedlogu odluke.

Pitanja za sekretara Abida Kolašince kao predlagača ove tačke postavio je poslanik Nabil Naser. Poslanik Nabil Naser je bio i jedini prijavljeni poslanik za diskusiju po ovoj tački dnevnog reda.

NAKON KRAĆE DISKUSIJE, DOPREDSJEDAVAJUĆI KEMAL ADEMOVIĆ JE POZVAO POSLANIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA POSLOVNIK O RADU VIJEĆA NACIONALNIH MANJINA KANTONA SARAJEVO, UZ PRIMJEDBU SEKRETARA KOJA PREDSTAVLJA BRISANJE ODREDBE ČLANA 5.

SKUPŠTINA JE JEDNOGLASNO (30 ZA) DONIJELA ODLUKU O DAVANJU SAGLASNOSTI NA POSLOVNIK O RADU VIJEĆA NACIONALNIH MANJINA KANTONA SARAJEVO.

AD – 13.

PRIJEDLOG ODLUKE O DAVANJU SAGLASNOSTI NA ODLUKU O PRIVREMENOM FINANSIRANJU POTREBA JU „SLUŽBA ZA ZAPOŠLJAVANJE KANTONA SARAJEVO” SARAJEVO ZA PERIOD OD 01.01. DO 31.03.2013. GODINE, BROJ: 05/1-1925/12 OD 13.12.2012. GODINE

Prijedlog odluke poslanici su dobili u dopunskom materijalu.

Uvodne napomene po ovom Prijedlogu odluke dao je ministar za rad, socijalnu politiku, raseljena lica i izbjeglice Kantona Sarajevo Muamer Bandić.

PRIJAVLJENIH ZA RASPRAVU NIJE BILO, PA JE DOPREDSJEDAVAJUĆI ADDEMOVIĆ POZVAO POSLANIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA ODLUKU O PRIVREMENOM FINANSIRANJU POTREBA JU „SLUŽBA ZA ZAPOŠLJAVANJE KANTONA SARAJEVO” SARAJEVO ZA PERIOD OD 01.01. DO 31.03.2013. GODINE, BROJ: 05/1-1925/12 OD 13.12.2012. GODINE.

GLASANJU JE PRISTUPILO 30 POSLANIKA I SKUPŠTINA JE JEDNOGLASNO DONIJELA ODLUKU O DAVANJU SAGLASNOSTI NA ODLUKU O PRIVREMENOM FINANSIRANJU POTREBA JU „SLUŽBA ZA ZAPOŠLJAVANJE KANTONA SARAJEVO” SARAJEVO ZA PERIOD OD 01.01. DO 31.03.2013. GODINE, BROJ: 05/1-1925/12 OD 13.12.2012. GODINE.

AD – 14.

PRIJEDLOG ODLUKE O DAVANJU SAGLASNOSTI NA IZMJENE I DOPUNE FINANSIJSKOG PLANA PRIHODA I IZDATAKA JAVNE USTANOVE “SLUŽBA ZA ZAPOŠLJAVANJE KANTONA SARAJEVO” SARAJEVO ZA 2012. GODINU

Prijedlog odluke poslanici su dobili uz poziv za sjednicu.

Poslanik Mujo Hošić je bio jedini poslanik koji se prijavio za diskusiju i on je kratko dao komentar na predloženu Odluku.

DOPREDSJEDAVAJUĆI ADEMOVIĆ JE POZVAO POSLANIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA IZMJENE I DOPUNE FINANSIJSKOG PLANA PRIHODA I IZDATAKA JAVNE USTANOVE “SLUŽBA ZA ZAPOŠLJAVANJE KANTONA SARAJEVO” SARAJEVO ZA 2012. GODINU.

SKUPŠTINA JE JEDNOGLASNO (30 ZA) DONIJELA ODLUKU O DAVANJU SAGLASNOSTI NA IZMJENE I DOPUNE FINANSIJSKOG PLANA PRIHODA I IZDATAKA JAVNE USTANOVE “SLUŽBA ZA ZAPOŠLJAVANJE KANTONA SARAJEVO” SARAJEVO ZA 2012. GODINU.

AD – 15.

PRIJEDLOG ODLUKE O DAVANJU SAGLASNOSTI NA PROGRAM RADA KANTONALNOG STAMBENOG FONDA SARAJEVO ZA 2013. GODINU

DOPREDSJEDAVAJUĆI JE KONSTATOVAO DA JE TAČKA 16 PRIJEDLOG ODLUKE O DAVANJU SAGLASNOSTI NA PLAN RADA SA FINANSIJSKIM PLANOM PRIHODA I RASHODA ZA 2013. GODINU KANTONALNOG STAMBENOG FONDA SARAJEVO, TE PREDLOŽIO DA SE OBJEDINI RASPRAVA ZA TAČKE 15 I 16, A GLASANJE DA SE OBAVI POJEDINAČNO. OVAJ PRIJEDLOG DOPREDSJEDAVAJUĆEG ADEMOVIĆA SKUPŠTINA JE PRIHVATILA VEĆINOM GLASOVA (ZA 23, UZDRŽAN 1 I 1 PROTIV).

OBZIROM DA PRIJAVLJENIH ZA DISKUSIJU NIJE BILO, DOPREDSJEDAVAJUĆI ADEMOVIĆ JE POZVAO POSLANIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA PROGRAM RADA KANTONALNOG STAMBENOG FONDA SARAJEVO ZA 2013. GODINU.

SKUPŠTINA JE VEĆINOM GLASOVA (18 ZA, UZDRŽANIH 4 I 2 PROTIV) DONIJELA ODLUKU O DAVANJU SAGLASNOSTI NA PROGRAM RADA KANTONALNOG STAMBENOG FONDA SARAJEVO ZA 2013. GODINU.

NADALJE, DOPREDSJEDAVAJUĆI ADEMOVIĆ JE POZVAO POSLANIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA PLAN RADA SA FINANSIJSKIM PLANOM PRIHODA I RASHODA ZA 2013. GODINU KANTONALNOG STAMBENOG FONDA SARAJEVO.

SKUPŠTINA JE VEĆINOM GLASOVA (18 ZA, 6 UZDRŽANIH I 3 PROTIV) DONIJELA ODLUKU O DAVANJU SAGLASNOSTI NA PLAN RADA SA FINANSIJSKIM PLANOM PRIHODA I RASHODA ZA 2013. GODINU KANTONALNOG STAMBENOG FONDA SARAJEVO.

Prije prelaska na realizaciju tačke 17, dopredsjedavajući Ademović je konstatovao da se tačke 17 i 18 odnose se na isti Fond, te predložio da se ove dvije tačke objedine i da se obavi jedinstvena rasprava.

AD – 17.

PRIJEDLOG ODLUKE O DAVANJU SAGLASNOSTI NA FINANSIJSKI PLAN FONDA KANTONA SARAJEVO ZA IZGRADNJU STANOVA ZA ČLANOVE PORODICA ŠEHIDA I POGINULIH BORACA, RATNE VOJNE INVALIDE, DEMOBILIZIRANE BORCE I PROGNANE OSOBE ZA 2013.GODINU, SA PLANOM RAZVOJNIH PROGRAMA – INVESTICIONIM PLANOM

AD – 18.

PRIJEDLOG ODLUKE O DAVANJU SAGLASNOSTI NA PROGRAMA RADA FONDA KANTONA SARAJEVO ZA IZGRADNJU STANOVA ZA ČLANOVE PORODICA ŠEHIDA I POGINULIH BORACA, RATNE VOJNE INVALIDE, DEMOBILIZIRANE BORCE I PROGNANE OSOBE ZA 2013.GODINU.

Skupština je jednoglasno (26 za) prihvatila prijedlog dopredsjedavajućeg Kemala Ademovića da se tačke 17 i 18 objedine u raspravi.

OBZIROM DA PRIJAVLJENIH POSLANIKA ZA RASPRAVU NIJE BILO, DOPREDSJEDAVAJUĆI ADEMOVIĆ JE POZVAO POSLANIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA FINANSIJSKI PLAN FONDA KANTONA SARAJEVO ZA IZGRADNJU STANOVA ZA ČLANOVE PORODICA ŠEHIDA I POGINULIH BORACA, RATNE VOJNE

INVALIDE, DEMOBILIZIRANE BORCE I PROGANE OSOBE ZA 2013.GODINU, SA PLANOM RAZVOJNIH PROGRAMA – INVESTICIONIM PLANOM.

OD PRISUTNIH 30, GLASANJU JE PRISTUPILO 28, 2 NISU GLASALA. ZA JE BILO 27 I 1 UZDRŽAN.

GLASANJU JE PRISTUPILO 28 POSLANIKA I SKUPŠTINA JE VEĆINOM GLASOVA (27 ZA I 1 SUZDRŽAN) DONIJELA ODLUKU O DAVANJU SAGLASNOSTI NA FINANSIJSKI PLAN FONDA KANTONA SARAJEVO ZA IZGRADNJU STANOVA ZA ČLANOVE PORODICA ŠEHIDA I POGINULIH BORACA, RATNE VOJNE INVALIDE, DEMOBILIZIRANE BORCE I PROGANE OSOBE ZA 2013.GODINU, SA PLANOM RAZVOJNIH PROGRAMA – INVESTICIONIM PLANOM.

NADALJE, DOPREDSJEDAVALA ADEMOVIĆ JE POZVAO POSLANIKE DA PRISTUPE IZJAŠNJAVANJU O PRIJEDLOGU ODLUKE O DAVANJU SAGLASNOSTI NA PROGRAM RADA FONDA KANTONA SARAJEVO ZA IZGRADNJU STANOVA ZA ČLANOVE PORODICA ŠEHIDA I POGINULIH BORACA, RATNE VOJNE INVALIDE, DEMOBILIZIRANE BORCE I PROGANE OSOBE ZA 2013.GODINU.

GLASANJU SU PRISTUPILA 24 POSLANIKA I SKUPŠTINA JE VEĆINOM GLASOVA (23 ZA I 1 SUZDRŽAN) DONIJELA ODLUKU O DAVANJU SAGLASNOSTI NA PROGRAM RADA FONDA KANTONA SARAJEVO ZA IZGRADNJU STANOVA ZA ČLANOVE PORODICA ŠEHIDA I POGINULIH BORACA, RATNE VOJNE INVALIDE, DEMOBILIZIRANE BORCE I PROGANE OSOBE ZA 2013.GODINU.

AD – 19.

IZVJEŠTAJ O REALIZACIJI PLANA POVRATKA U I IZ KANTONA SARAJEVO ZA PERIOD 01.01.-30.06.2012. GODINE SA OSVRTOM NA PROBLEMATIKU OBEZBJEĐENJA ALTERNATIVNOG – NUŽNOG SMJEŠTAJA

Ovaj Izvještaj su poslanici dobili uz poziv za sjednicu.

PRIJAVLJENIH ZA RASPRAVU NIJE BILO, PA JE DOPREDSJEDAVALA ADEMOVIĆ POZVAO POSLANIKE DA PRISTUPE IZJAŠNJAVANJU O IZVJEŠTAJU O REALIZACIJI PLANA POVRATKA U I IZ KANTONA SARAJEVO ZA PERIOD 01.01.-30.06.2012. GODINE SA OSVRTOM NA PROBLEMATIKU OBEZBJEĐENJA ALTERNATIVNOG – NUŽNOG SMJEŠTAJA.

GLASANJU JE PRISTUPILO 27 POSLANIKA I SKUPŠTINA JE VEĆINOM

**GLASOVA (24 ZA I 3 SUZDRŽANA) USVOJILA IZVJEŠTAJ O REALIZACIJI
PLANA POVRATKA U I IZ KANTONA SARAJEVO ZA PERIOD 01.01.-30.06.2012.
GODINE SA OSVRTOM NA PROBLEMATIKU OBEZBJEĐENJA
ALTERNATIVNOG – NUŽNOG SMJEŠTAJA.**

Dopredsjedavajući Kemal Ademović je konstatovao da su iscrpljene sve tačke utvrđenog dnevnog reda 22. sjednice Skupštine Kantona Sarajevo, pa je zaključio rad na sjednici i poželio svima sretne praznike.

**RAD NA 22.SJEDNICI SKUPŠTINE KANTONA SARAJEVO
OKONČAN JE U 22,40 SATI.**

**SEKRETAR
SKUPŠTINE KANTONA**

Abid Kolašinac, dipl.pravnik

**PREDJEDAVAJUĆA
SKUPŠTINE KANTONA**

Prof.dr Mirjana Malić

Sastavni dio ovog zapisnika su stenografske bilješke, audio i CD snimak sjednice, koji se čuvaju u Službi za skupštinske poslove Skupštine Kantona Sarajevo.